



QUINTA SESSIONE STRASURDINARIA DI U 2018
SEME SESSION EXTRAORDINAIRE DE 2018
28 È 29 DI GHJUNGHJU
28 ET 29 JUIN

2018/E5/041

DUMANDA À BOCCA POSTA DA Romain COLONNA
À NOME DI U GRUPPU FEMU A CORSICA

OGETTU : U castellu di a Punta : travagli d'urgenza è prugettu patrimoniale

O sgiò Pridente di l'esecutivu,

Troppu spessu omu hè cunvintu chì a parte detta « materiale » di u patrimoniu lasciatu da a Storia hè miseria in Corsica. È puru, s'ellu ùn si tratta quì di paragonà cù altri lochi o cità d'Europa o in altrò in lu mediterraniu è in lu mondu, hè ricca a Corsica à livellu patrimoniale cù parechji bastimenti è munumenti chì danu sensu à i nostri lochi, à u nostru campà cumunu è à u nostru populu.

Ci ne hè unu in particolare, chì forse l'Aiaccini cunnusciarunu à pena megliu cà l'altri : u famosu castellu di a Punta.

Castellu di u XIX^{esimu} seculu, veru è imprissionante elementu di u patrimoniu aiaccinu è aldilà di a Corsica sana, lascita trimenda di a Storia di Corsica, pruprietà iniziale di i Pozzo di Borgo, munumentu cunnusciutu dinò pà esse statu custruitu cù petre di u palazzu pariginu di e Tuileries.

Pudaria esse issu castellu, senza parà in Corsica, l'ogettu di una pulitica patrimoniale è culturale ambiziosa assai. Aldilà di u bastimentu stessu, di l'aspettu architeturale, di u so valore storicu, economicu, hè appaghjata à u situ una qualità ambientale trimenda cù par un dettu circa 40 ettari di tarreni.

Què ghjè pà l'aspetti pusitivi chì a situazione materiale è sanitaria di u castellu, invece, hè gattiva assai. U bastimentu hè frustu è si guasta sempre à pena di più ogni ghjornu è à le volte in modu irreversibile.

Parechje problematiche s'aghjustanu à què. Aldilà di l'aspettu finanziariu impurtante, si tratta di l'accessu à u castellu, di i travagli ch'è no qualificaremu d'urgenza è di sicura, si tratta di un prugettu d'avvene pà u sfruttamentu di u castellu è di i so tarreni à cantu. Si sà chì u sfruttamentu à longu andà di u situ hè liatu in modu strettu à a problematica di l'accessu.

A prurietà è a gistione di u bastimentu eranu sinu à avà di u Cunsigliu dipartimentale di Corsica sottana. Oramai hè pruprietaria a nostra Cullettività.

Tandu sarà doppia a dumanda : u votu di u bugettu primitivu hà messu in risaltu u fattu ch'elli eranu privisti da 2018 à u 2020 travagli di ristoru d'urgenza è di messa in sicurezza. À chì ne semu di quelli travagli postu ch'elli sò « urgenti » di pettu à a situazione materiale è sanitaria di u castellu ?

È senza aspittà una risposta difinitiva in issu primu annu di mandatura nova, vuliamu avè in calchì parola u vostru sintimu nantu à u metudu è a pulitica patrimoniale da mette in ballu mentre a mandatura à prò di u castellu di a Punta, tisoru di u patrimoniu aiaccinu è isulanu corsu ?

À ringrazià vi.